



Make Sophie Ionesibindzi lesikhulu

Thandiwe Dlodlo
Simon Mokoena





Ngalelinye lilanga kushisa bhe! Khosi bekehla enyuka atibuta kutsi yini langayenta.

Make wakhe wahamba ekhaya waya emasimini.

“Yini nje lengingayenta njengobe ngingedvwa?” kusho Khosi akhuluma yedwana.



Ngekushesha, Khosi wafikelwa licebo.

“Ngitawuhamba ngiyobhukusha emfuleni, kodvwa ngubani lengitawuhamba naye? Make akafuni ngihambe ngedwana,” kucabanga Khosi.

Kutsite kusenjalo, kwengca Make Sophie aya emfuleni. Bekaphetse libhavu lelikhulu leligcwele timphahla.



“Aha! Ngitawulandzela Make Sophie njengobe aya emfuleni,” kusho Khosi acabanga. Wagijima walandzela Make Sophie. “Ngicela kuhamba nawe emfuleni,” kucela Khosi. Make Sophie wamoyitela wabese uvuma ngenhloko.

Batsite basahamba, kwachamuka Nozipho wahamba nabo. Nozipho bekangakutsandzi kubhukusha kepha bekatsandza kubukela labanye nababhukusha.



Nasebafikile emfuleni, Khosi wacabanga watsi,
“Lamuhla, angifuni kubhukusha emantini langashoni
njengemntfwana lomncane, ngifuna kubakhombisa
bonkhe kutsi mine ngiyakwati kubhukusha lapho
kushona khona.”

Wagcumela emantini. Wabhukusha, washona,
avumbuka.

Nozipho bekabukela akhashane ngesikhatsi umngani
wakhe abhukusha nalabanye bantfwana.



Ngesikhatsi Nozipho abukele, bekabona kutsi bonkhe bantfwana bajabulile njengobe basekhatsi emantini.

Bebabhukusha babanga umsindvo.

Bebamemetana bajabulile emantini.



Utsite Nozipho nabukisisa kahle, wabona lokutsite lokwehlukile.

Khosi besekabhukusha khashane nalabanye bantfwana.

Nozipho wasondzela kancane waphindze wabuka. Etfuswe nguloko labekubona, waya kubomake labebawasha timphahla eceleni kwemfula.

“Sitani! Khosi uyamita,” kumemeta Nozipho.



Ngekuphatima kweliso, Make Sophie wagcumela emantini. Wabhukusha ngekushesha.

Wangena ngephansi kwemanti, waphindze wavumbuka, wangena ngephansi futsi, afuna Khosi. Wabamba Khosi ngemkhono waya naye emantini langashoni.

Nabefika lapho, Make Sophie watitimisa Khosi wamkhiphela ngaphandle kwemanti.



Make Sophie washakutela wendlula ecenjini
lebantwana nabomake lebebakhala futsi bamemeta.

Nozipho bekagijima emva kwakhe njengobe Make
Sophie ameme Khosi amphutfumisa emtfolamphilo
wendzawo.



Nakefika emtfolamphilo make wahlangana nemhlengikati Noxolo lowaphutfuma kute asite Khosi.

Masinyane umhlengikati watsatsa Khosi wammikisa egunjini lekulashwa kantsi labanye bahlengikati beta batosita uMhlengikati Noxolo.

“Ukahle! Sibe nenhlanhla ngobe akazange ahlale sikhatsi lesidze ngephansi kwemanti!” kusho umhlengikati.



Make Sophie waphefumulela etulu akhululeka.


Wonkhe umuntfu emtfolamphilo wambonga ngekuba kwakhe nesibindzi.

“Ngiyabonga ngekutsi ngikhonile kusindzisa kuphila kwemuntfu,” kusho Make Sophie ngekutfobeka.



Letindzaba tefika etindlebeni tendvuna yase itfumela sitfunywa kutsi siyewubita Make Sophie. Indvuna yalalelisisa ngesikhatsi Make Sophie achaza kutsi waba njani ngumbhukushi lonelikhono.

“Ngesikhatsi ngiseyintfombatane, umngani wami bekahlala ngesheya kwemfula. Emanti abeyincenye yekuphila kwetfu. Besiphoccelelekile kutsi sikufundze kubhukusha. Umfula bekuyindzawo lebesidlala kuyo, sinatsa, siwasha futsi sidoba kuwo!” kusho Make Sophie.



Indvuna yabita umhlangano wesigodzi yabuye yakhipha sincumo sekutsi ibonge Make Sophie ngesento sakhe sesibindzi. Bafati balilitela, emadvodza ashaya tinkhwela, bantfwana bamemeta ngenjabulo.

Kusukela ngalelolangi, bantfwana bebatsandza kulandzela Make Sophie nakaya nobe ngabe ngikuphi. Bewubeva bahlabelela batsi, “Kute lokungangitsintsa, ukhona Make lonesibindzi sibili!”



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



basic education

Department:
Basic Education
REPUBLIC OF SOUTH AFRICA

The Ulwazi Lwethu readers and storybooks have been quality assured and approved by DBE.

Your attribution should include the following:

Title: Make Sophie Ionesibindzi lesikhulu

Author/s: Thandiwe Dlodlo

Translator/s: Simangele Khoza

Illustrator/s: Simon Mokoena

Assurer/s: Mduduzi Benjie Shongwe

Language: Siswati



© Zenex Foundation - Saide 2025 (Updated Edition)

CC BY includes the following elements:

BY  – Credit must be given to the creator

